



14. august 2026

UKA2026/396

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiunneqarpoq:

Kalaallit Nunaat tamakkerlugu ulluunerani paaqqinnittarfinni, tassunga ilanngullugit meeraaqqerivinni meeqqerivinnilu, angajoqqaat akiliisarnerisa atorunnaarsinneqarnerata qanoq kinguneqarsinnaanerata misissorneqarnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinermi angusat kingusinnerpaamik UPA2027-mi saqqummiunneqassapput.

(Inatsisartunut ilaasortaq Lars Poulsen, Siumut)

Tunngavilersuut:

Meeqqat tassaapput nunatsinni siunissavut. Taamaattumik meeqqanik perorsaanermi ineriartortitsinermilu inuiaqatigiittut aningaasaliineq siunissamut aningaasaliineruvoq.

Ullumikkut angajoqqaat meeqqamik ulluunerani paaqqinnittarfinniititsinerminnut akiliuteqartarput. Akiliutissat annertussusaat kommunimi najugaqarneq, isertitat kiisalu ilaqutariinni meeqqat amerlassusaat naapertorlugit aalajangersarneqartarput. Tamanna ilaqutariinnut amerlasuunut aningaasatigut annertuunik artukkiisarpoq.

Siumumit kissaatigaarput meeqqiornissaq ilaqutariinnut aningaasatigut aporfissaannginnerulersissallugu. Nunarput innuttaqarnerulissappat, meerartaarnissaq inuiaqatigiinnit pitsaanerusumik tapersersorneqartariaqarpoq.

Misissuinerit assigiinngitsut takutippaat ilaqutariit ilaasa meerartaarnissartik kinguartittaraat imaluunniit meeqqanik amerlanerusunik perusukkaluarlutik aningaasaqarnikkut periarfissaqannginneq pissutigalugu aalajangertarlutik. Taamaattumik meeqqerivinnut akiliuteqartarnermik atorunnaarsitsineq ilaqutariinnut oqilisaataasinnaavoq kiisalu meerartaarnissamut kajumissuseqarnerulernermut iluaqutaasinnaalluni, soorunami aamma ulluinnarni inuuniarnikkut ilaqutariinnut meerartalinnut aningaasaqarnikkut pitsaasumik ilapittuutaassaaq.



Tamatuma saniatigut akeerutsitsineq angajoqqaanut tamanut assigiimmik periarfissiissaaq, meeqqallu tamarmik pitsaasumik ineriartornissamut, ilinniarnissamut inooqataanissamullu periarfissaqarnissaat tapersorsorlugu.

Meeqqat perorlutik ilinniagaqarlutik suliffeqaleraangata akileraarutitigut inuiaqatigiinnut utertitsisarput. Taamaattumik meeqqanut aningaasaliineq siunissaq ungasinneq isigalugu inuiaqatigiinnut iluanaarutaassaaq, aningaasartuutaannaanani.

Taamaattumik Siumumit siunnersuutigaarput ukioq 2027 aallarnerfigalugu nuna tamakkerlugu ulluunerani paaqqinnittarfinnut, nuna tamakkerlugu meeraaqqerivinnut meeqqerivinnullu angajoqqaat akiliuteqartarnerat atorunnaarsinneqassasoq.

Pisortanut aningaasatigut allaffissornikkullu kingunerisassai:

Misissuinermit ukiup affaanut atorfilittap sulinerani aningaasartuutit 125.000 kr. Missaaniinnissaat naatsorsuutigineqarpoq.

Paasissutissat kommuninit pissarsiarineqartut naapertorlugit Avannaata Kommuniani aamma Qeqqata Kommuniani angajoqqaat akiliutigisartagaat ukioq 2025-imi immikkut tamarmik 6 mio. kr.-it missaanniissimapput. Qeqertalik Kommuniani angajoqqaat akiliutigisartagaat 4,5 mio. kr.-it missaanniillutik.

Kommuneqarfik Sermersuumit aamma Kommune Kujallermi paasissutissat siunnersuummik saqqummiussinermut atatillugu pissarsiarineqarsinnaasimangillat. Taamaattumik siunnersuutip pisortanut aningaasatigut kingunerisassai tamakkiisumik naatsorsorneqarsinnaasimangillat.

Naalakkersuisut siunnersuutip piviusunngortinneqarnissaanut atatillugu kommunit annaasaqaataasa matussuserneqarnissaat pillugu aningaasalersuinissamik siunnersuuteqarnissaat naatsorsuutigineqarpoq.

Allaffissornikkut kingunerisassai annikitsuinnaassapput, tassami angajoqqaanit akiliutinik naatsorsuisarneq, akiligassiisarneq akileeqqusisarnerlu atorunnaassammata.

Namminersortunut aningaasatigut allaffissornikkullu kingunerisassai:

Siunnersuut namminersorlutik inuussutissarsiortunut aningaasatigut imaluunniit allaffissornikkut toqqaannartumik kinguneqassanngilaq.

Innuttaasunut aningaasatigut allaffissornikkullu kingunerisassai:

Angajoqqaat meeqqamik ulluunerani paaqqinnittarfirmiititsinermut akiliuteqartarunnaassapput, taamaalillutillu ilaqutariit aningaasatigut oqilisaaffigineqassallutik. Siunnersuut innuttaasunut allaffissornikkut annertunerusumik kinguneqassanngilaq.